



**MAJLIS PELANCARAN MINGGU KESELAMATAN DAN
KESIHATAN PEKERJAAN 2016 PERINGKAT
KEBANGSAAN**

9 OGOS 2016

UCAPTAMA OLEH:

**YB DATO' SRI HAJI ISMAIL BIN HAJI ABD. MUTTALIB
TIMBALAN MENTERI SUMBER MANUSIA**

Disediakan oleh:

Sekretariat Majlis Negara bagi Keselamatan dan Kesihatan Pekerjaan

Rujuk Senarai Protokol

Assalamualaikum wbt, Selamat Pagi, Salam Sejahtera dan Salam Satu Malaysia,

1. Terlebih dahulu, saya ingin meluahkan rasa gembira kerana pada hari ini, saya dapat hadir bersama tuan-tuan dan puan-puan semua di Majlis **PELANCARAN MINGGU KESELAMATAN DAN KESIHATAN PEKERJAAN 2016 PERINGKAT KEBANGSAAN**. Saya juga ingin mengambil kesempatan untuk mengucapkan ribuan terima kasih kepada pihak penganjur kerana sudi menjemput saya pada hari ini

2. Di kesempatan ini ingin saya rakamkan ucapan tahniah kepada Pengerusi dan semua Ahli Jawatankuasa Kerja yang terlibat, di atas komitmen dan kesungguhan yang ditunjukkan bagi menjayakan penganjuran majlis ini. Tidak ketinggalan juga, penghargaan diberikan kepada pihak Jabatan Keselamatan dan Kesihatan Pekerjaan (JKKP) dan juga Pertubuhan Keselamatan Sosial (PERKESO) di atas komitmen dan kerjasama yang

diberikan dalam memastikan penganjuran majlis ini menjadi satu kejayaan.

Tuan-tuan dan puan-puan yang dihormati sekalian,
(Latarbelakang Minggu KKP)

3. Minggu Keselamatan dan Kesihatan Pekerjaan adalah satu acara tahunan yang disambut setiap tahun susulan daripada kelulusan dan arahan Kabinet pada 24 Mei 2006. Pelbagai program dan aktiviti dirancang dan dijalankan bagi menjayakan sambutan minggu KKP. Sambutan ini bertujuan bagi menghebahkan maklumat terkini berkaitan isu-isu keselamatan dan kesihatan serta mempromosi pembentukan dan pemeliharaan budaya kerja selamat dan sihat di kalangan majikan, pekerja dan orang awam.

4. Pada tahun ini “**SoHELP- Memperkasa Higien Industri**” telah dipilih sebagai tema kempen Minggu KKP. Tema ini dipilih selari dengan Program 1 Strategi 4 Pelan Induk Keselamatan dan Kesihatan Pekerjaan 2020 (OSHMP 2020) iaitu Merekayasa Pengurusan Higien

Industri dan menjadi hasrat Kerajaan dan Jabatan khususnya untuk mencapai negara maju di mana keselamatan dan kesihatan pekerja dapat dipastikan melalui pencegahan kemalangan dan penyakit pekerjaan di tempat kerja. Ini dapat dicapai melalui gandingan dan kerjasama trapatite daripada pihak kerajaan, majikan dan pekerja.

5. Persekitaran yang selamat dan sihat akan mewujudkan rakyat Malaysia yang bekerja di dalam keadaan harmoni dan sejahtera. Dengan itu, ekonomi negara akan dijana dengan lebih pantas seiring dengan hasrat Kerajaan bagi menjadikan Malaysia sebuah negara yang berpedapatan tinggi.

Tuan-tuan dan puan-puan yang dihormati sekalian,
(OSHMP 2020)

6. Pihak Kerajaan terus komited dalam memacu pertumbuhan ekonomi negara dengan lebih meluas bagi meletakkan Malaysia di jajaran yang kukuh di masa hadapan. Saya sedar, sebagai negara yang sedang

berkembang pesat pelbagai usaha telah dilakukan oleh kerajaan untuk meningkatkan lagi infrastruktur di dalam negara di antaranya projek menaiktaraf kemudahan pasarana pengangkutan awam seperti LRT dan MRT, pembinaan lebuh raya, penambahan kawasan perindustrian dan pelbagai lagi usaha dirancang untuk kesejahteraan dan keselamatan rakyat dan seterusnya menarik minat pelabur asing ke negara kita. Selain itu, Kerajaan juga komited dengan memberikan penumpuan dan penekanan terhadap isu-isu keselamatan dan kesihatan pekerjaan kepada mereka yang bekerja agar mereka dilindungi daripada risiko-risiko keselamatan dan kesihatan pekerjaan yang mungkin timbul akibat daripada aktiviti pekerjaan yang mereka jalankan.

7. Di dalam usaha kerajaan menangani isu-isu berkaitan KKP ini, Kementerian Sumber Manusia melalui Jabatan Keselamatan dan Kesihatan Pekerjaan (JKKP), telah melancarkan Pelan Induk KKP 2016-2020 atau lebih dikenali sebagai OSHMP2020 pada Perhimpunan Hari Pekerja pada 1 Mei yang lepas oleh YAB Perdana Menteri Malaysia. Pelan induk ini dilaksanakan bagi membangun

dan mengekalkan budaya kerja selamat dan sihat di tempat kerja. Saya secara keseluruhannya menyokong penuh hasrat murni ini dan berharap ianya dapat dicapai menjelang tahun 2020 kelak.

Tuan-tuan dan puan-puan yang dihormati sekalian,
(SoHELP-Memperkasa Higien Industri)

8. Berdasarkan statistik Jabatan Keselamatan dan Kesihatan Pekerjaan (JKKP) terdapat peningkatan pelaporan penyakit dan keracunan berkaitan pekerjaan daripada tahun 2006 hingga 2014. Keadaan ini amatlah membimbangkan dan perlu diberi perhatian sewajarnya. Saya telah difahamkan pihak JKKP telah menjalankan inisiatif baru iaitu membangunkan program pengurusan higien industri yang mantap dan sistematik di tempat kerja bagi membantu mengurangkan pendedahan pekerja kepada risiko kesihatan yang berpunca daripada aktiviti pekerjaan seperti pendedahan berlebihan kepada bahan kimia, paras kebisingan dan faktor risiko ergonomik.

9. Program pengurusan higien industri ini akan dilaksanakan secara berperingkat, teratur dan sitematik. *Systematic Occupational Health Enhacement Level Programme* atau *SOHELP* ini lebih mudah untuk dilaksanakan oleh majikan dan pengamal KKP berbanding dengan program pengurusan higien industri yang bersifat konvensional. Kewujudan program seumpama ini akan dapat membantu mengubah persepsi terhadap program pengurusan higien industri di tempat kerja yang pada kebiasaanya dilihat sebagai sesuatu yang kompleks dan sukar untuk dilaksanakan. Oleh yang demikian, saya amat berharap agar langkah dan inisiatif yang dijalankan ini akan dapat mencegah atau mengurangkan risiko penyakit dan keracunan berkaitan pekerjaan.

Tuan-tuan dan puan-puan yang dihormati sekalian,
(*Pencapaian KKP*)

10. Untuk makluman pihak kerajaan melalui Jabatan Keselamatan dan Kesihatan Pekerjaan sentiasa menjalankan penguatkuasaan bagi memastikan semua tempat kerja berada di dalam keadaan selamat. Pada

tahun 2015 sahaja, pihak Jabatan Keselamatan dan Kesihatan Pekerjaan (JKKP) telah menjalankan sebanyak lebih kurang **258,800 pemeriksaan** ke atas tempat kerja dan jentera. Berdasarkan jumlah pemeriksaan tersebut, sebanyak **22,190 notis** telah dikeluarkan, **913 kesalahan** dikenakan kompaun dan sebanyak **353 kes** pendakwaan di mahkamah telah diambil atas kesalahan berkaitan keselamatan dan kesihatan di tempat kerja. Ini menunjukkan bahawa Kerajaan amat komited dalam memastikan setiap kehendak perundangan yang telah ditetapkan adalah dipatuhi sepenuhnya oleh setiap pihak yang terlibat.

11. Aspek keselamatan dan kesihatan pekerjaan (KKP) tidak boleh dipertikaikan lagi keperluannya dalam pelaksanaan setiap aktiviti pekerjaan oleh para majikan daripada pelbagai sektor di Negara ini. Persekitaran tempat kerja yang kondusif perlulah disediakan agar pekerja dapat menjalankan tugas dengan selesa, selamat dan sihat selain menjamin keselamatan orang awam yang berada berhampiran dengan tempat kerja berkenaan.

12. Objektif utama Pelan Induk bagi Keselamatan dan Kesihatan Pekerjaan 2020 (OSH MP 2020) adalah mengurangkan kadar kemalangan negara di tempat kerja. Dengan komitmen yang sepenuhnya serta usaha yang digembleng di antara pihak kerajaan, majikan dan pekerja, barulah pelan induk ini akan mencapai objektifnya. Untuk makluman para hadirin sekalian, kadar kemalangan negara bagi tahun 2015 adalah **2.81 per 1,000 pekerja**. Manakala pada tahun 2014 adalah sebanyak **3.10 per 1,000** pekerja. Ini menunjukkan penurunan sebanyak **9.35 peratus**. Syabas dan tahniah diucapkan di atas komitmen, serta kerjasama yang diberikan dikalangan majikan dan pekerja.

Tuan-tuan dan puan-puan yang dihormati sekalian,
(*Saranan*)

13. Amalan budaya kerja selamat dan sihat di tempat kerja perlu diterapkan dan diamalkan oleh semua pihak sama ada majikan mahupun pekerja bagi memastikan dan mencegah kemalangan dan penyakit pekerjaan dari berterusan berlaku di negara kita. Saya amat berharap

kadar kemalangan pekerjaan Negara akan terus menurun pada masa hadapan dan seterusnya dapat memberi impak positif kepada Negara bahawa bekerja di Malaysia adalah selamat dan sihat. Ini sekaligus dapat meyakinkan pelabur - pelabur dari luar untuk terus membuat pelaburan perniagaan di Negara kita.

14. Sebelum saya mengakhiri ucapan saya, sekali lagi saya mengucapkan terima kasih dan tahniah kepada Jawatankuasa Penganjur di atas komitmen dan kesungguhan yang ditunjukkan bagi menjayakan penganjuran **Minggu Keselamatan dan Kesihatan Pekerja 2016 Peringkat Kebangsaan** pada tahun ini. Tahniah juga saya ucapkan kepada semua peserta yang hadir di atas komitmen dan kerjasama yang diberikan dalam menjayakan majlis ini.

15. Saya juga amat percaya dengan kombinasi di antara majikan yang prihatin, pekerja yang berkualiti dan produktiviti, sistem pengurusan keselamatan dan kesihatan pekerjaan yang efektif serta keadaan persekitaran kerja yang kondusif, maka pastinya produk

dan perkhidmatan yang dihasilkan oleh sesebuah organisasi akan mencapai tahap dan standard yang dikehendaki.

16. Saya dengan ini melancarkan **Minggu Keselamatan dan Kesihatan Pekerjaan 2016 Peringkat Kebangsaan.**

Sekian, saya sudahi dengan wabillahitaufik walhidayah,
Wassalamualaikum w.b.t. Terima kasih.